

TORE SERGIO



Calia e...

Simenza

2000

TORE SERGIO

***Calia e...
Simenza
2000***

*I disegni e le foto delle copertine di "Calia e... Simenza" 1998, 1999 e 2000,
sono dello stesso autore*

PRESENTAZIONE

A questo punto non si può più dire che Tore Sergio sia il poeta della Domenica. A dire il vero non l'avevamo mai pensato, ma l'occasionalità dell'uscita della prima raccolta di versi dialettali: "Calia e Simenza 1" del '98 ci aveva tratto un po' in inganno. Era nota la verve poetica dell'Autore, ma l'appuntamento ormai annuale: "Calia e Simenza 2" lo scorso anno e "Calia e Simenza 2000" quest'anno, un po' lungi dal prevederli, Lo consacrano verseggiatore prolifico e raffinato.

Egli, in verità, ha sempre scritto, raccolto, documentato e, solo in questi ultimi anni, complice l'attività culturale svolta dall'Associazione per la tutela delle tradizioni popolari del trapanese, associazione che l'Autore frequenta e alla quale, Lo ringraziamo, dedica una poesia, ha avuto modo di farsi conoscere ed apprezzare come poeta dialettale. Preferiamo definirLo "dialettale" ad onta della Sua cultura perché il Suo modo di vivere, di pensare, di comunicare non possono trovare migliore corrispondenza in versi se non nell'utilizzo della lingua siciliana e quella trapanese in particolare ed in ciò, quindi, nessuno sforzo di rielaborazione pseudointellettuale o di traduzione forzata.

Così parla, così scrive, così è.

Altro stimolo la moglie Gemma che Lo invoglia.

Quante volte, attorno ad un gustoso risotto ai funghi da Lei cucinato, non ha invitato il consorte a recitare

or questa or quella poesia evidenziando capacità di discernimento!

Tore Sergio è un poeta prolifico, dicevamo, di quelli che hanno la poesia nell'anima e che verseggiavano ad ogni emozione, ad ogni sensazione, ad ogni avvenimento sapendo essere ora acuto, ora fine, ora mordace, ora ironico, ora satirico, ora spregiudicato ma sempre coerente con se stesso e con i temi affrontati.

La pubblicazione di Sue poesie su "Lumie di Sicilia" rivista culturale dei siciliani di Toscana, unita ad una nota critica assai lusinghiera, Lo hanno particolarmente emozionato e, per uno che poeta e stampa per godimento personale e dei tanti estimatori, non è cosa da poco e Lui saprà farne tesoro.

Complimenti Tore, continua!!!

Salvatore Valenti

CUNSIDDIRATIMI

Tutti nna nostra vita
quarchi pazzia facemu
e mancu iò, davveru,
nni potti fari a menu.

Senza fari sfirizzi
o autri strammarii
di la testa mi sceru
sti quattru poesii.

Man manu chi arrivavanu,
o d'estati, o di 'nvernu
li posteggiavu scritti
dintra un 'ranni quadernu.

Qualcunu chi li vitti
rissi: -"sunnu spiticchi"
o li fai pubblicari
o ti tiru l'aricchi -.

Accussì mi decisi
e li fici stampari,
pinsannu chi poi 'unn'era
tantu "caruta a mari".

Febbraio 2000

A MUNTISEDDA

Chi friddu chi c'è stiornu,
u ventu o Baliu canta,
ma idda nesci u stessu
ammugghiata nna manta.
cu i manu a teni stritta,
'ncuddata sutta u mentu,
chi stiornu si camina
muvennusi cu stentu.
Passettu pi passettu,
avanza a pocu a pocu:
l'occhi, u nasu, a vuccuzza
e i masciddi di focu
su sulu scummigghiati.
Ma è tutta la me vita !
mi sentu 'n Pararisu
si passa Margherita.

Natale 1999

U PRISEPIU

E nasciu lu Bammineddu !
Biunnu, biunnu e beddu beddu.
L'avi 'mmrazza Maria
e u cori e l'occhi s'arricria.
Puru Giuseppi appuiatu o vastuni
talia tuttu di n' agnuni,
mentri u voi cu l'asineddu
fannu 'anticchia di cauriceddu.
I Pastura cu l'occhi sbarrati,
allucuti e un pocu scantati
l'accummogghianu c'un velu,
memtri l'Anciuli cantanu 'n Cielu.

I RICETTI DA CASSA MUTUA

Si u tempu e' bonu a l'acqua un ci si metti
stamatina cunsighu li ricetti.
li ricetti cuntati e abbirsati
chi ogni misi mi lassanu i malati.

L'assistenza un fussi tantu laria
si 'ntesta si mittissiru sti "ngrisi"
chi pagari nn'avissiru ogni misi !
E invece ssi carogni soccu fannu ?

Spissu fannu passari quasi un annu.
Sta cosa 'un si pò cchiù suppartari,
e ora sta finennu p'annuiari.

E si tutti nni mittissimu d'accordu (*)
e dicissimu p'accuminciari
chi i miricini s'avissiru a pagari ?

(*) - Cosa difficilissima, anzi impossibile, con tanti "ricconi" di collegbi.

Domenica 9 Maggio 1999

U FUCILI CALIBRU 32

Haiu un vecchiu fucili a na canna,
na pispisedda, un iritu e s'aisa,
ereditatu da na vecchia zia,
ch'appi piaciri di lassallu a mia.

“Hai ammazzatu mai a nuddu?” c’addumannu.
Iddu mi senti ma nun si “scomponi”
tisu appuiatu darrè u termusifoni.
Era d’un zio marasciallu, puliziottu,

lu caricava a palla, sulu un bottu.
A tracodda u tinia stannu a cavaddu
senza chi ci pisava supra u coddu.

Si lu purtava quann’era in serviziu
e facia di scorta a lu Prefettu,
e sempri l’avia prontu supra u pettu.

U CAVALERI

Ch'è bellu m'hannu a fari Cavaleri !
(Mu riassi lu zu Tanu Cancilleri.)
cavalieri di Carlu Magnu e Pagu
e avi un pezzu chi c'è cumpari Jacu.

Me mogghi quannu ntisi sta rubrica
mi rissi: - Nun ti rugnu cchiù la "nica",
chi stu cavaleratu nun existi
e tutta la to testa ti futtisti !

Io pi fari a idda ranni stizza,
già m'abbuccai cu na cavallerizza
di l'Opera Cavalli ch'è nno chianu,
ch'appressu ci siminanu lu granu.

Ma lu zu Tanu inchennu u so bicchieri
mi rissi: - penza già sì Cavaleri !
e vivennu cchiossai tra diri e 'un diri :
- custa - dissi - seicentumilaliri !!!

AMANITA

Scritta il 13.05.1969 - Pomeriggio

Ricordando una passeggiata fatta nelle pinete alle falde di Erice circa 30 anni fa.

A prima vota chi nna me vita
'ncuntra i signura AMANITA
fu sutta i pineti di Martogna.

Bedda slanciata cu cappeddu apertu,
la vitti di luntanu e subitu fui certu.
Bianca, appena viridina, parìa di celluloidi,
magnifica, stupenda : "Amanita falloide"

I pinaroli gianni eranu tutti affruntati
davanti a sta Regina di tutti li passati !
La vardai pi tanticchia ,
ma ora chi si fà ?
ti cogghiu,
troppu bedda si p'arristari ccà !

Pirati'un ti nni rugnu,
petri 'un ti nni lanciu,
ma tu mi canuscisti
e sai chi nun ti manciu.
Si bedda, mi nni gloriu,
cu tia sugnu sinceru.
Tanti chi t'hannu amatu,
già sunnu o Cimiteru !!

L'"Amanita falloides" è tra i funghi più velenosi che esistono.

SUNNANNU TONINU

Toninu Pocorobba chi facisti ?
senza assabbinirica ti nni isti ?
Ora chi bboni iamu cu li funci,
Parenti e Amici tutti nni lassasti.

T'aspittavamu a Casali e 'un vinisti.
- Mali pinzammu appena t'assentasti -
Un misi poi lottasti cu la Morti,
Tuttu fu fattu, ma 'un ci la facisti !

Si 'n Pararisu criscinu li funci,
aspittavanu a tia, e perciò acchianasti.
Cchiù di ducentu speci canuscisti,

sicuramenti, senza cchiù contrasti.
U Signuri ti vosi, e fu decisu
d'aviri a tia pi funci 'n Pararisu.

VIVA LA PACI

Il 25/4/1982 , a richiesta delle Sinistre, si è svolta una manifestazione antiNATO, organizzando una marcia, anzi una gita ciclistica da Trapani a Marausa. per l'occasione.

Viva la Paci e abbassu la verra
e i missili TERRA-TERRA.
abbassu la verra "sanguinaria"
e i missili TERRA-ARIA.

Semu tutti cca riuniti
genti sula o di Partiti,
pirchè avemu a protestari
pi na cosa ch'hannu a fari:
in provincia di Ragusa
una cosa assai fitusa.
Propriu appressu a li palazzi
vonnu mettiri li razzi
di difisa AMERICANI
strafuttenu a "noi ITALIANI"

Protestamu pi la Paci
cu nna sacca pani e caci.
protestamu in bicicletta
pedalannu "senza fretta".
Una bella scampagnata
pi la paci minacciata.

%

Una marcia “bella, bella”
chi finisci “ ‘n camporella”.
A Marausa ‘emu arrivari
pi la Paci assicurari.
Vonnu fari cosi di pazzi,
a finemu cu sti razzi ?
Basta allura cu sti mostri
e pinzamu airazzi nostri !!

MUDDICHEDDI

Cantieri

A Napula c'è un gran cantieri-scola
ch'arrizza fossa, canala e cannola.
Pi 'un diri tutti, dicemu parecchi,
parinu sciuti du spizziu di vecchi.

U munnizzaru

U zu 'Ntoni da munnizza
ogni banna chi va appizza,
si si ferma nno zu Ginu
si vivi puru u bicchirinu.
Ma pi veniri in Farmacia
ogni tantu perdi a via.

Igienicu

U dutturi Venilacqua
sempri avi prontu u vacili cu l'acqua;
e pi ogni viddanu chi tocca
si lava le mani e si sciacqua la bocca

Matinaru

U dutturi Cannolettu
ogni matina cari du lettu.
e setti si metti a tavulinu
e aspetta chi trasi lu primu mischinu.

Postali

l'Officiali da Posta e a so Signura
rapinu l'Officiu di bon'ura'
ma si paganu a pensioni
matrimia chi cunfusioni'

A stidda

A Napula aviamu na bidella
chi 'n frunti si purtava "na stella":
tutti vulianu cunfirenza,
e ci facianu scappari a pacenza.
Ma si a Maestra ci facia na cumannata
firriava pa Napula tutta a matinata.

Stratunaru

Avemmu un stratunaru
c'un viziù paru,paru:
d'appuiarisi a la zappa,
mentri u tempu passa e scappa.
Si un muturi s'avvicina
"lui" ripigghia a zappatina
cantu,cantu, 'ntunnu i pali,
(si mai fussi un principali).
Poi un'occhiata a lu riloggiu
sunnannu i pali cu l'appoggiu.

Profetica

U zu Tanu Cufufù
nno Dutturi 'un ci va cchiù,
cu na miricina mia,
su purtaru a Ragusia.

Pi finilla

Un meu amicu cavaleri
stiornu fa chiddu d'aeri.
Si ti porta poi o cafè
iddu mancia e paghi te.
Ma u sinnacu fa u cafè
e si nni futti di mia e di te.

FESTA D'ESTATI 1990

- Na vicchiarredda donna Ciccia Nofria
cincu minuti prima di muriri
dissi na cosa giusta :

“Megghiu’un diri chi diri.”

E iò chi parlu sempri
dicu “semu arrè tutti”
lamentannumi ancora
pi rubinetti asciutti.

(ma cca puru d’estati
si trova la sosizza !!)

Nenti di lamentari
riguardu la munnizza.-

- A solita parlata ...
chi ‘unn’avi sensu e puddu ! -

- E subitu vi ricu
chi ora ‘un toccu a nuddu,
vi ricu u tempu è bbonu,
‘un c’è figghi e figghiastri,
mittiti puddicini
e avriti li puddastri !
mittiti a fermentari
u mustu a tempu giustu,
ma spissu v’addunati
ch’arresta sempri mustu !
Ci fu ‘n’amicu meu
chi stava a “Terrimuzzi”
chi siminau miluna
e arricugghiu cucuzzi.

%

Vulennu priparari
a sarsa nne buttigghi
(è cosa chi cca fannu
quasi tutti i famigghi)
ci fu cu mbuttigghiau,
travagghiannu di notti,
e cu centu buttigghi
poi fici centu botti.
Ma a festa è sempri festa,
tutti i cosi su bboni:
cu pani e murtadella
faciti culazioni.
E pi fari cchiù festa
sapiti a me pinzata?
pi dumani faciti
na 'ranni cuscusiata !
e pi fari na cosa
chi 'unn'è na cosa nova
p'accompagnari u cuscusu
friiti pisci cu l'ova !
poi pi sira faciti
na 'ran cena abbunnanti
chi poi p'addigiriri
v'aiutanu li Santi.
E si li Santi poi
'un vi tennu a la vista,
'un vi preoccupati
v'arresta u farmacista.

Settembre 1999

UFFA! SEMPRI DINTRA

Si nne paisi'un c'è cchiù l'usanza
di scupari puru fora ogni matina,
a fimmina, o liscia, o cu la panza
p'affacciarisi sturiau na cosa fina,

du pertuni, finestra o finistruni
s'affaccia a scutulari l'assiruni,
na scutulata longa, bedda,bedda,
bbona occasioni pi na taliatedda.

E si po fari na longa affacciata
pi stenniri a robba da lavata;
e p'accattari i pisci o a virdura,

chi passanu a matina a stessa ura.
Poi sempri dintra, senza cchiù occasioni;
sulu pa Missa o quarchi prucissioni.

A STATUA

Nno museu di Vigata
c'è na statua 'mpalata;
fatta c'un certu gustu.
'unn'è na statua sana:
è un mezzu bustu.

D'un omu 'rassu, supra a sissantina:
è appuiata vicinu a na vetrina.

Avi i capiddi ricci,
l'occhiuzzi a pampinedda,
appena, appena riri,
nè laria, nè bedda.

Sì greco? Sì romanu? O medievali?
Fusti politicanti o generali?
'Un c'è scrittu cu fù, 'un si sapi nenti
e si tu ci addumanni 'un ti senti.
Unni nascisti mai? Ti mittivi u cappeddu?
Soccu ci avivi dintra u ciriveddu?

ASSOCIAZIONI TRADIZIONI POPOLARI TRAPANESI (A.T.P.T.)

Pi stari 'nsemmula 'un c'è chi fari
ci vonnu i "TRADIZIONI POPOLARI".
È nun si legginu nè calii, nè simenzi,
ci su bellissimoi CUNFIRENZI.

(Parlannu a na cristiana
chi campa a nautru munnu,
mi rissi: - iò cunfirenza
'unn'haiu ratu mai a nuddu -).

Chi capiu ssa gnoranti
di tutta a situazioni?
I NOSTRI CUNFIRENZI
servinu p'istruzioni.

Parlanu avvocati,
duttura o professura,
i presenta u Prisirenti
e parla pi mezzura.
Poi parla u Segretariu
doppu di la chiusura,
e, 'un cunchiurennu nenti,
parla nautra mezzura.

Ma la cosa cchiù bella
chi poi allegra a sirata
è quannu si finisci
cu na ranni manciata!
Si iemu a posti rustici
o iemu 'ntrattoria,
sempri a stessa è la musica
chi piaci puru a mia:
Satamu 'nmezzu e piatta
paremu tanti "grilli",
e n'abbuffamu tantu,
parennu COCCODRILLI.

4 Giugno 1999

BUTTUNA

Vi parlu di buttuna,
ma chiddu chi s'aspetta
chi sunnu li buttuna
chi chiurinu a giacchetta,
doppu ssa me parlata,
s'adduna chi pigghiau
na rossa cantunata.

I buttuna di cui parlu
senza farivi 'mpressioni
su i buttuna chi si toccanu
pi na raccumannazioni.

Cu na sula tuccata
spissu si trova u scogghiu;
ma u buttuni fuinziona
si tu ci metti l'ogghiu.
E sai qual è tu l'ogghiu
chi movi li buttuna?
'Unn'è ogghiu di machina,
ma sù tanti miliuna!
Si rapinu purtuna
chi eranu beddi chiusi,
ma pi tanti cristiani
arrestanu rausi.

Al CIRCOLO ANZIANI di San Giuliano (Trapani), primavera 1998 - Verso la fine della serata, una socia ballando si accascia a terra e muore.

RICORDANDO MARIA

Firriavi, abballavi
firriavi leggera,
sunava a musica
na polka straniera.
Ti vitti allintari
e u tò cavaleri
spinciri ti vulia,
ma t'allintaru i peri.
Ti misiru 'nterra
stinnigghiata,
curriu l'ambulanza
cu na telefonata.
Acqua nna facci,
attintavanu u cori;
quarcunu pinzava:
cca chista nni mori!
U tò cori stancu,
forsi, 'un nni potti cchiù
rissi ora mi fermu
e cu fu, fu!!!

Ma c'è na cosa chi tutti 'un sannu:
forsi, a megghiu morti è moriri abballannu.

Estate 1999

I VENTILATORI

Haiu quattru ventilatori tutto fari
chi d'estati m'aiutanu a campari.
Picchi a notti, quannu u cauru sbampa,
'un facemu chi diri: "un si campa".
Dui sù 'n farmacia, unu appizzatu 'n tettu
e n'altu svintulia supra u stipettu.
U terzu supra, nna stanza di soggiurnu,
nni fa aria si assittati di iornu.
U quartu, chi è chiddu di chiù effettu,
fa ventu supra u comò da stanza di lettu.
Unu c'è sempri pi tutta la iurnata
puru 'n cucina sa tavula è cunzata..
Perciò tantu pu cauru 'un mi lagnu!
Mu scurdavu: unu c'è puru nno bagnu.

*Ricordando le belle serate danzanti con gli amici del
Circolo Anziani di Rilievo (Bona Cerami) - 1998*

ABBALLAMU, ABBALLAMU!

Viva li ranni festi di l'estati!
Speci quannu ci sunnu l'abballati.
A Ummari o a Palazzolu Busetu,
oppuru a Napula nun c'è cchiu quetu.

Si presentanu sempri e novi
i ballarini di Bona Cerami,
ossia du circulu di l'anziani.
(E abballassiru finu a dumani)

Quantu serati, quantu complessi,
ma i canzuni su sempri i stessi
Polki, mazurki, valzer e tanghi
e tutti i coppie s'annacanu i cianchi.

Ma abballanu dopu na mezzura
sculanu già tutti di surura,
e chiddi cu i caddi strapazzati
ogni tantu si stannu assittati.

Dda cristiana ch'abballa a sulu
si zaccuaria tuttu lu culu;
U zu Tanu ca mogghi nova
abballa e pari chi scaccia l'ova,

%

Mentri un cristianu cu vrazzu rettu
sata e vulissi tuccari u tettu,
e chiddi chi cummattinu cu i ciuri
firriani 'ntunnu cu tantu amuri.

Ma si è già tardu e funisci a sirata
tutti si lancianu la stessa occhiata,
addumannannusi sani, sani:
"unn'è chi iemu a ballari dumani?"

Turnannu 'n casa cu l'ossa rutti
dumani, penzanu, SEMU ARRÈ TUTTI.

29 Gennaio 1999

FEBBRAIO

Finutu lu ran friddu?
S'allonganu i iurnati?
U sulì d'ammucciati
u trovi strati strati.

Quarchi ciuriddu sboccia
di mennuli nno ramu.
(Livativi ssi nguanti
scummigghiati li manu).

I addrini stracantanu
puru si 'un fannu l'ovu,
e u cielu è accusì beddu
pittatu pari novu.

Un muraturi frisca
e aisa li cantuna,
pinsannu chi già 'casa
calaru i maccarruna.

Du finistruni scotula
tappita a cammarera,
tutti ricemu: un misi
e arriva a PRIMAVERA!

31 Gennaio 1999

CHI NIVI CHI CHIUVIU

Iò finu aeri scrissi
“tra un misi è primavera”
ed invece stanotti
ci fu na ‘ran bufera.
Chi appena arruspigghiati
si presentarù bianchi
i casi e puru i strati

Ed acchianai a Valderici
pi putilla viriri,
ma arrivatu a Ficu
‘un potti proseguiri.
ci fu na granni fiocca
di giumma grossi e bianchi,
chi ammantaru la machina
supra u tetту e davanti.

Machini mpirugghiati,
si caminava ‘n prima
e ci nn’eranu puru
cu nne roti a catina.
Ma doppu pranzu appena
anticchia u suli sciu
si vitti un gran spettaculu
chi lu fa sulu Diu.

Chi tutta na biancura
eranu li campagni
e chini di ricotta
parianu li muntagni.
C’eranu tanti machini
chi stavanu a firriari
e ghianu araciu, araciu
pi unn’asciddicari.

U SCARVACCHEDDU

Nno Circulu d'Anziani
a duminica s'abballa,
c'è cu talia assittatu
e cu firria a farfalla.
Un scarvaccheddu niuru
supra i maruna bianchi,
firriava 'nmezzu i peri
di cu annacava i cianchi.
Iò lu puntai cu l'occhi
pinzannu cu fu, fu,
chi ora mi lu scaccianu
e 'unn'esisti chiù.
Ma stu furbacchiu,
"driblannu" comu 'n campu,
u viria chi firriava
supra u maruni biancu;
un pocu ia luntanu,
ma poi turnava avanti,
pari si nni futtia
di tutti sti 'ranni ammi.
Ma quannu poi attaccau
na musica cchiù leggìa,
facennu un largu giru,
si nni iu sutta na seggia.

Circolo Anziani di Bona Cerami - Rilievo 8 Ottobre 1999

Febbraio 2000

I FUNCII STRANIERI

U patri di la scienza
Linnèu, granni scenziatu,
vattiau tutti i viventi
chi sunnu nno Creatu.
E chiddi chi sturiau,
secunnu a so 'ntenzioni,
li cuminciau a chiamari
tutti: nomi e cugnomi.
Cugnomi fu lu "generi"
e nomu fu, invece,
chiddu chi li scenziati
definiscinu "specie".

Puru tutti li funcii
hannu nomi e cugnomi,
ma comu li cristiani
spissu hannu un supprannomi:
ci su i funcii di fella,
di pagghia, i picurini,
i mazzi di tammuru
e puru li chiodini,
d'abbisu e poi di chiuppu,
di pali ficurini,
i piriti di lupu,
di terra, l'anicini.

%

Ma cu è assai praticu,
e 'un nasciu aeri
li chiama cu la scienza
e 'un su "nomi stranieri"
A taliallu qualcunu
nni pari accussì beddu,
sutta avia na coppa
e nno coddu 'n'aneddu.
Pari na maravigghia,
e 'un ti pari veru,
chi di chissu qualcunu
ti manna o Cimiteru!
Generi Amanita
si chiama a dilla fina,
spissu finisci bbona
sulu cu a "cacarina".
(Dicemula pulita):
ti veni a "diarrea";
tra chissi è a megghiu funcia:
AMANITA CESARÈA.

Marzo 2000
L'OVU "XL"

Supermercatu a Napula?!

È cosa veru nova.

Ci trovi mille cosi

ci sunnu puru l'ova!

(na vota li vinnia

puru Bonaventura).

Ma chissi du Convè

sunnu ova a misura,

e si li voi accattari

estremamenti belli

pigghiali di formatu

sempri XL.

A povira addrina,

sculannu du surura,

i sapi fabbricari

a massima misura.

Ma doppu chi ci nesci

un ovu accusi rausu

pi quantu tempu poi

c'abbrucia lu pirtusu?

Giugno 2000

L'ULTIMA

Ma quantu poesii
sta testa ha sbrucculatu!
Tanti sunnu recenti
e tanti du passatu.
Iddi sunnu lu specchiu
di tanti situazioni
vinutimi all'aricchiu
cu troppa convinzioni.
Abbozzu i primi versi,
macari la chiusura
e poi cuminciu a scriviri
puru pi na mezzura.
Tutta sta tiritera
oramai m'ha stancatu,
chi l'anni su pisanti
pi chiddu chi haiu firriatu.
Fici accusi un pinzeri
dicennu: cu fu fu,
ora mi scrivu l'ultima
e 'un nni scrivu cchiù!
l'ultima, ...quasi u giuru,
a tutti chiedu scusa,
qualcuna li paroli
la ficiru rausa.
L'ultima e doppu basta!
E soccu è fattu è fattu.
Calamuci la pasta
e poi a mittemu nno piattu.
...Ma 'un mi sentu sicuru,
si poi mi veni u sfiziu?
"Chi u lupu perdi u pilu
però c'arresta u vizio".

INDICE

Pag.	5	- Cunsidirati
"	6	- A muntisedda
"	7	- U prisepiu
"	8	- I ricetti da cassa mutua
"	9	- U fucili calibru 32
"	10	- U Cavaleri
"	11	- Amanita
"	12	- Sunnannu Toninu
"	13	- Viva la paci
"	15	- Muddicheddi
"	17	- Festa d'estati 1990
"	19	- Uffa! Sempri dintra
"	20	- A statua
"	21	- Associazioni Tradizioni Popolari Trapanesi
"	22	- Buttuna
"	23	- Ricordando Maria
"	24	- I ventilatori
"	25	- Abballamu, abballamu!
"	27	- Febbraio
"	28	- Chi nivi chi hiuviu
"	29	- U scarvaccheddu
"	30	- I funci stranieri
"	32	- L'ovu XL
"	33	- L'ultima

stampato nel mese di luglio 2000
dalla soc. coop. nuova radio - trapani

